

Na osnovu člana 13. Zakona o reviziji privatizacije državnog kapitala u privrednim društvima i bankama („Službene novine Federacije BiH“, br. 55/12), direktor Agencije za reviziju privatizacije putem Vlade Federacije Bosne i Hercegovine, Parlamentarnoj komisiji Federacije Bosne i Hercegovine i Parlamentu Federacije Bosne i Hercegovine dostavlja,

## **INFORMACIJU O IZVRŠENIM REVIZIJAMA PRIVATIZACIJE DRŽAVNOG KAPITALA PRIVREDNIH DRUŠTAVA I BANAKA U FEDERACIJI BOSNE I HERCEGOVINE ZA PERIOD JANUAR– JUNI 2018. GODINE**

### **UVOD**

Agencija za reviziju privatizacije u Federaciji Bosne i Hercegovine (u daljem tekstu: Agencija) djeluje kao samostalna institucija u Federaciji Bosne i Hercegovine, čija je djelatnost propisana odredbama člana 7. Zakona o reviziji privatizacije državnog kapitala u privrednim društvima i bankama („Službene novine Federacije BiH“, broj 55/12) u daljem tekstu (Zakon).

Na osnovu člana 13. Zakona, Agencija je dužna svakih šest mjeseci putem Vlade Federacije Bosne i Hercegovine informirati Parlamentarno povjerenstvo Federacije Bosne i Hercegovine, Parlament Federacije Bosne i Hercegovine o izvršenim revizijama privatizacije državnog kapitala privrednih društava i banaka u Federaciji Bosne i Hercegovine.

Agencija ima svojstvo pravnog lica.

Sjedište Agencije je u Sarajevu, Ulica Ustanička 11, Ilidža.

Organizacija, upravljanje i rukovođenje Agencijom uređuje se Uredbom i drugim općim aktima Agencije, u skladu sa Zakonom.

Ostvarenje planiranih zadataka izvršit će se u skladu sa Zakonom, a oni se odnose na zaštitu prava građana utvrđenih Ustavom Federacije Bosne i Hercegovine državne svojine u procesu privatizacije u Federaciji Bosne i Hercegovine i javnog interesa zaštićenih vrednota, ukupnog pravnog poretka, javnog morala te postizanja ciljeva propisanih odredbama člana 4. Zakona o reviziji privatizacije na način da se utvrdi je li u postupku privatizacije došlo do povrede odredbi Zakona o privatizaciji.

### **STRATEŠKI CILJEVI**

Agencija je u okviru svojih zakonskih ovlasti i obaveza djelotvornog i brzog izvršavanja povjerenih joj zadataka, utvrdila tri ključna strateška cilja koja će joj pomoći u realizaciji ostvarenja njezinih ciljeva:

<b>Strateški ciljevi</b>		
Uposliti revizorsko i administrativno osoblje koje ispunjava uslove za obavljanje poslova iz njene nadležnosti, u skladu sa posebnim uslovima utvrđenim Pravilnikom o unutrašnjoj organizaciji radnih mjesta Agencije.	Izvršiti profesionalno i odgovorno proces revizije privatizacije privrednih društava i banaka za navedenu godinu spram finansijskih sredstava i raspoloživosti ljudskih resursa, a u skladu sa Zakonom o reviziji privatizacije državnog kapitala u privrednim društvima i bankama.	U toku revizije privatizacije, a u skladu sa zakonskim obavezama, izvještavati Vladu FBiH, Parlament Federacije BiH i cjelokupnu javnost o procesima revizije u vidu izvještaja (polugodišnjih, godišnjih i završnog izvještaja).

## **PLAN RADA ZA 2018. GODINU**

Odlukom Vlade Federacije Bosne i Hercegovine V. broj: 244/2018 od 21.03.2018. godine, usvojen je Plan rada za 2018. godinu, kojim je planirano 6 (šest) privrednih društava i 5 (pet) banaka, koje treba revidirati, a rađen je u skladu sa trenutno zaposlenim revizorskim osobljem (5 revizora).

## **RAD NA REVIZIJI PRIVATIZACIJE**

Odgovornost revizora je sačiniti Izvještaj o obavljenoj reviziji pretvorbe i privatizacije privrednog društva i banke na osnovu utvrđenog činjeničnog stanja. Postupci revizije započinju donošenjem Rješenja o otpočinjanju revizije, te slanje svim relevantnim stranama dopisa za prikupljanjem dokumentacije potrebne za proces revizije.

Najveći dio podataka i dokumenata prikuplja se od Federalne Agencije za privatizaciju i kantonalnih agencija za privatizaciju, Agencije za bankarstvo, kod privrednih društava i banaka kod kojih će se obaviti revizija, te od ostalih relevantnih institucija i organa koji su učestvovali u procesima privatizacije. Revizija privatizacije je vršena u skladu sa Zakonom o reviziji privatizacije državnog kapitala u privrednim društvima i bankama ("Službene novine Federacije BiH", broj 55/12), i Zakonom o reviziji institucija u Federaciji Bosne i Hercegovine ("Službene novine Federacije BiH", broj 22/06). Postupak revizije proveden je u skladu sa revizorskim standardima Međunarodne organizacije vrhovnih revizijskih institucija – INTOSAI ("Službene novine Federacije BiH", br. 30/11 i 62/14) i Etičkim kodeksom profesionalne etike revizora.

Djelujući u tom smjeru, sprovodile su se sljedeće aktivnosti:

- odlazak i održavanje sastanaka sa predstavnicima pomenutih Agencija, ministarstvima (premijerima i ministrima);

- saradnja sa Komisijom za vrijednosne papire, Financijskom policijom te kantonalnim tužilaštvima i sudovima;
- održavanje sastanaka sa predstavnicima privatiziranih preduzeća;
- svakodnevno udovoljavanje i održavanje sastanaka sa zainteresiranim licima povodom privatizacije odnosnih preduzeća (načelnici općina, općinska vijeća, sindikati, radnici);
- pružanje informacija medijima, povodom pokrenutih revizija i informisanje o istim.

U tekstu koji slijedi, prikazan je pregled pokrenutih revizija u prvoj polovini 2018. godine:

### **1. „Bazna hemija“ d.d. Vitkovići - Goražde**

Rješenjem Agencije za reviziju privatizacije u Federaciji Bosne i Hercegovine broj: 01-02-1-351/17 od 16.10.2017. godine, a u skladu sa odredbama Zakona o reviziji privatizacije državnog kapitala u privrednim društvima i bankama (Sl. novine Federacije BiH br. 55/12), i usvojenim Planom rada Agencije za reviziju privatizacije u Federaciji Bosne i Hercegovine za 2017. godinu, pokrenut je postupak revizije privatizacije privrednog društva „Bazna hemija“ d.d. Vitkovići - Goražde.

Prvobitno je odlukom o imenovanju revizora broj: 01-02-1-351-1/17 od 16.10.2017. godine imenovana je Selma Hodžić, dipl. iur., kao ovlašteni revizor za postupak revizije privatizacije navedenog privrednog društva.

Naknadnim Odlukama o imenovanju revizora broj: 01-02-1-351-2/17 od 18.12.2017. godine, i broj: 01-02-1-351-3/17 od 11.01.2018. godine imenovani su Sean Buturović, dipl. iur., i Selma Halilagić, dipl. oec., kao ovlašteni revizori za reviziju privatizacije privrednog društva „Bazna hemija“ d.d. Vitkovići – Goražde.

U periodu od donošenja predmetnog Rješenja i pokretanje postupka revizije, revizori su se konstantno susretali sa poteškoćama u prikupljanju dokumentacije neophodne za provođenje procesa revizije i izradu Nacrta izvještaja, posebno radi činjenice što je revidirano pravno lice nastalo reorganizacijom tj. podjelom nekadašnjeg UNIS H.I. Azot d.j.l. Vitkovići Goražde na pet pravnih subjekata.

Nakon što su revizori uputili dopise svim relevantnim institucijama, te zatražili dokumentacionu osnovu za izradu revizijskog izvještaja, nisu mogli doći u posjed dokumentacije na osnovu koje bi izradili Izvještaj, te su dana 08.03.2018. godine revizori sačinili službenu zabilješku, u kojoj je navedeno koja dokumentacija nedostaje.

### **2. PD „Dubrava“ d.d. Cazin**

Dana 26.03.2018. godine doneseno je Rješenje o pokretanju postupka revizije privatizacije državnog kapitala privrednog društva „Dubrava“ d.d. Cazin, br. 01-02-1-129/18.

Shodno navedenom, obratili smo se Kantonalnoj agenciji za privatizaciju Bihać, radi dostavljanja potrebne dokumentacije. Dana 06.04.2018. godine zaprimili smo njihov dopis br. 01-30-72/18, u kojem navode da su svu dokumentaciju dostavili tužilaštvu USK. Tužilaštvo nam je dostavilo svu dokumentaciju, koju su izuzeli iz KAP Bihać.

Dana 02.04.2018. godine smo uputili zahtjev broj 02-19-1-137-2/18 za dostavljanje dokumentacije i pravnom licu, ali nismo dobili nikakav odgovor. Nakon toga, smo uputili i urgenciju broj: 02-19-1-137-13/18 dana 22.05.2018. godine, ali nismo dobili nikakav odgovor, niti dokumentaciju, iako je vlasnik u usmenom razgovoru, istu obećao dostaviti.

Obzirom da u dokumentaciji koju je tužilaštvo dostavilo, nedostaje relevantna dokumentacija za sačinjavanje revizorskog Izvještaja, 02.07.2018. godini uputili smo dopis nadležnom tužilaštvu zahtjev za daljnje postupanje po istom. Navedeni postupak revizije je još uvijek u toku.

### **3. „Famos“ d.d. Sarajevo**

Rješenjem br. 01-02-1-68/18 od 06.02.2018. godine pokrenut je postupak revizije privatizacije privrednog društva „FAMOS“ d.d. Sarajevo, na osnovu kojeg je Odlukom broj: 01-02-1-68-1/18 od 06.02.2018. godine imenovana Selma Hodžić, dipl. iur., kao ovlaštenu revizor za postupak revizije privatizacije navedenog privrednog društva i sačinjavanje izvještaja o izvršenoj reviziji pretvorbe i privatizacije. Navedeni postupak revizije je još uvijek u toku.

### **4. „JANJ“ TGS d.d. Donji Vakuf**

Rješenjem o pokretanju postupka revizije privatizacije broj 01-02-1-414/17 dana 20.12.2017. godine je pokrenut postupak revizije privatizacije privrednog društva D.I. „JANJ“ TGS d.d. Donji Vakuf.

Prikupljanje i obrada dokumentacije odnosno revizija privatizacije navedenog privrednog društva okončana je 29.03.2018. godine.

Na osnovu utvrđenog činjeničnog stanja sačinjen je Nacrt izvještaja o obavljenoj reviziji privatizacije „JANJ“ TGS d.d. Donji Vakuf broj: 03-19-2-417-25/17 od 09.03.2018. godine i dostavljen Upravi društva na očitovanje.

Na Nacrt izvještaja o obavljenoj reviziji privatizacije „JANJ“ TGS d.d. Donji Vakuf Agencija za reviziju privatizacije Federacije BiH nije primila očitovanje.

Slijedom navedenog sačinjen je Izvještaj o obavljenoj reviziji privatizacije i pretvorbe „JANJ“ TGS d.d. Donji Vakuf broj: 03-19-2-417-29/17 od 29.03.2018. godine, te Rješenje o izvršenoj reviziji pretvorbe i privatizacije „JANJ“ TGS d.d. Donji Vakuf broj: 01-02-1-414-2/17 od 29.03.2018. godine.

Navedeni akti su dostavljeni nadležnim institucijama na očitovanje.

Obzirom da na Rješenje o izvršenoj reviziji pretvorbe i privatizacije „JANJ“ TGS d.d. Donji Vakuf broj: 01-02-1-414-2/17 od 29.03.2018. godine nije bilo uloženi žalbi, revizija privatizacije ovog društva je uspješno okončana.

## **REVIZIJA BANAKA**

### **1. „Una Banka“ d.d. Bihać**

Rješenjem broj 01-02-1-109/18 dana 13.03.2018. godine je pokrenut postupak revizije privatizacije „Una banke“ d.d. Bihać.

Prikupljanje dokumentacije i revizija privatizacije navedene Banke trajalo je do 12.07.2018. godine, na osnovu čega je sačinjena službena zabilješka broj: 03-19-2-116-36/18 obzirom da Agenciji za reviziju privatizacije Federacije BiH nije dostavljena ključna dokumentacija potrebna za provođenje postupka revizije.

Dana 13.07.2018. godine privremeno je prekinut postupak u predmetu revizije privatizacije „Una banke“ d.d. Bihać zaključkom broj: 01-02-1-109-2/18. Navedeni zaključak je dostavljen nadležnim institucijama.

U ostavljenom roku od 15 dana Agencija za reviziju privatizacije Federacije BiH nije bilo izjavljenih žalbi na zaključak kojim je privremeno prekinut postupak revizije privatizacije „Una banke“ d.d. Bihać.

### **2. „Vakufska banka“ d.d. Sarajevo**

Rješenjem o pokretanju postupka revizije privatizacije broj 01-02-1-216/18 od 31.05.2018. godine započet je postupak revizije privatizacije „Vakufska banka“, d.d. Sarajevo. Do kraja perioda Informacije o radu na revizijama započeta revizija nije okončana., te se očekuje njeno okončanje u drugoj polovici godine.

## **FAKTORI USPJEHA RADA I RIZICI**

Napominjemo da se Agencija svakodnevno susreće sa poteškoćama u smislu sprovedbe Zakona o reviziji privatizacije. U najvećem dijelu to se ogleda u prikupljanju dokumentacije, jer u takvim slučajevima Agencija nema mehanizam da pokrene procedure kaznenih odredbi, a koje su kao takve navedene u Zakonu. S tim u vezi Agencija može tek da obavijesti nadležno tužilaštvo, što Agencija trenutno i radi. U postupku revizije i primjene Zakona uočene su određene nejasnoće i neusklađenosti Zakona sa drugim općim zakonima u Federaciji Bosne i Hercegovine. Pojedine odredbe zakona su prevaziđene, a neke je opet nemoguće primjeniti, zbog toga je neophodno da se pristupi izmjenama i dopunama zakona.

S obzirom da je broj privrednih društava i banaka koje Agencija treba da revidira, a koje su privatizirane u prošlom periodu, znatno veliki, a isto tako i onih narednih privatizacija koje tek trebaju da se izvrše, za uspješno obavljanje revizija, neophodno

je u budućem periodu raditi na povećanju budžeta kako bi se povećao broj revizora, a samim tim bi se povećao i broj revizija i po tom osnovu Agencija mogla u većem obimu mogla uzimati predmete u rad.

## **ZAKLJUČAK**

Uspostavljanje Agencije za reviziju privatizacije i njena Zakonom i aktima Vlade Federacije Bosne i Hercegovine definisana djelatnost ima važnu ulogu u ostvarenju ciljeva ulaska u evropske integracije. Proces revizije privatizacije s aspekta evropskih integracija je veoma važan i bitan, što se pokazalo i kod Upitnika Evropske komisije upućenog Bosni i Hercegovini. Transparentnost procesa provedene privatizacije, najbolje se može sagledati kroz revidirani proces, što u konačnici traži i zahtjeva i Evropska komisija.

Agencija za reviziju privatizacije je u potpunosti posvećena da izvrši sveobuhvatnu reviziju privatizacije na profesionalan i odgovoran način, na načelima dosljedne primjene Zakona, uputa i odluka Vlade Federacije Bosne i Hercegovine, transparentnosti u radu i otvorenosti za sve institucije i stručnu javnost, ali i primjerenog pravnog okruženja, te adekvatnog provođenja aktivnosti nadležnih institucija kako bi ostvarila uspješan rad i strateške ciljeve.

**Broj: 01-05-1-329/18**

**Sarajevo, 08.11.2018. godine**

**DIREKTOR**

Vedad Duraković, dipl.oec.